

FOTO: U Sarajevu priređen i vatromet Poetak Nove 1434. hidžretske godine obilježena

14/11/2012 23:12 by Administrator

Prigodnim programom, uz učešće dova i ilahija, te predavanjima u Kuvajtskoj džamiji u Sarajevu na svečanosti je obilježena Nova 1434. hidžretska godina. U programu je učestvovao i hor Medžlisa Islamske zajednice Sarajevo, a vjernici su nakon svečanog obilježavanja, koje je priređeno u džamiji, imali priliku učestvovati i u vatrometu koji je bio priređen povodom dočeka Nove hidžretske godine.

Glavni imam Medžlisa Islamske zajednice Sarajevo mr. Ferid Dautović, podsjetio je u izjavi za agenciju Anadoluja, da je Nova 1434. hidžretska godina u Sarajevu, svečano obilježena u mnogim džamijama, te najavio nastavak prigodnih svečanosti i u narednim danima.

Obilježavanje nove hidžretske godine u BiH čuva svoju tradicionalnu dimenziju, kroz organizaciju brojnih svečanosti i akademija.

On je ukazao na važnost poruke Nove hidžretske godine ali i same Hidžre, preseljenja Poslanika Muhammeda iz Mekke u Medinu, budući da se na taj način prenosi univerzalna poruka ravnopravnosti i socijalne pravde.

Prema njegovim riječima važno je obilježavanje ovog datuma u historiji Islama, budući da je datum Nove hidžretske godine u svijetu javnosti manje poznat.

„Želimo da Bošnjaci razumiju i da se identificiraju sa svojom Hidžrom, sa Hidžrom Poslanika Muhammeda, ali i sa svojim hidžretskim kalendarom koji se počeo računati sa halifom Omerom“, kazao je Dautović.

On je ukazao na važnost očuvanja bošnjačkog identiteta, posebno kada je u pitanju predstojeći popis stanovništva.

„Važno nam je da Bošnjaci razumiju i shvate da nam je važno da u nacionalnom smislu jesmo Bošnjaci, po vjeri muslimani i da govorimo bosanski jezik“, istakao je Dautović i dodao „da nas tome uči i Hidžra, nacionalnom osvjetljenju koje je krenulo sa agresijom i postagresorskom periodu kada je važno naglašavanje da se nacionalno i vjersko pitanje ne suprotstavljaju jedno drugom“.

Hidžretska nova godina se računa od Hidžre, preseljenja poslanika Muhammeda i prvih muslimana iz Mekke u Medinu, što se dogodilo 622. godine po gregorijanskom kalendaru.

Sutra, sa prvim danom Nove hidžretske godine, u Gazi Husrev-begovoj džamiji u Sarajevu bit će dodijeljena Menadžura novoizabranom 13. reisu-l-ulemi mr. Huseinu efendiji Kavazoviću. Muslimani u Bosni i Hercegovini u Novu hidžretsku godinu ulaze i sa novim reisu-l-ulemom.

Izvor vijesti: Vijesti.ba/Anadolija